

3. Verkefni félagsins er að viðhalda góðri fiskgengd á félagssvæðinu, og að ráðstafa veiði eftir því, sem félagsfundur ákveður. Félagið tekur til allrar veiði á félagssvæðinu.
4. Stjórn félagsins skipa þrír menn, formaður og tveir meðstjórnendur. Skulu þeir kosnir á aðalfundi til þriggja ára í senn. Ganga þeir úr stjórninni á víxl þannig, að formaður gengur úr eftir eitt ár, annar meðstjórnandinn eftir tvö ár og hinn eftir þrjú ár, og helzt svo sama röð áfram. Enginn atkvæðisbær félagsmaður getur skorazt undan endurkosningu, nema sérstök forföll hamli, eða hann hafi verið í stjórn í þrjú ár. Kjósa skal tvo varamenn og tvo endurskoðendur til tveggja ára í senn, þannig að annar varamaðurinn og annar endurskoðandinn gangi úr annað árið og hinir hitt árið.
5. Stjórnin hefur á hendi allar framkvæmdir félagsins milli aðalfunda. Hún fær menn sér til aðstoðar við þau störf í þágu félagsins, sem vinna þarf á hverjum tíma, og semur við þá um þóknun fyrir. Formaður er fulltrúi félagsins út á við og hefur yfirumsjón með öllum störfum félagsins og fjárreiðum.
Óheimilt er öllum að veiða á félagssvæðinu, nema með sérstöku skriflegu leyfi félagsstjórnarinnar. Í leyfinu skal tekið fram um veiðitíma og veiðitæki, og með hvaða kjörum leyfið er veitt.
6. Aðalfund skal halda í marz mánuði ár hvert. Á aðalfundi skýrir stjórnin frá störfum félagsins á liðnu starfsári og leggur fram tillögur sínar um starfsemi þess á næsta ári. Þá skal hún leggja fram endurskoðaða reikninga félagsins, og úrskurðar fundurinn um þá.
7. Reikningsár félagsins er almanaksárið. Stjórninni ber að færa reikningana í gerðabók, sem henni er skylt að halda, svo og samþykktir félagsins, félagaskrá, arðskrá, fundargerðir og bréf.
8. Arði af veiðisvæðinu skal, að frádregnum kostnaði varið til uppgræðslu og gróðurverndar á afrétti Biskupstungna.
9. Brot á samþykkt þessari varðar sektum samkvæmt XVI. kafla laga nr. 76/1970, um lax- og silungsveiði.

Samþykkt þessi staðfestist samkvæmt lögum nr. 76 25. júní 1970, um lax- og silungsveiði, og birtist til eftirbreytni öllum þeim, sem hlut eiga að máli.

Landbúnaðarráðuneytið, 7. júlí 1971.

Ingólfur Jónsson.

Þorv. K. Þorsteinsson.

REGLUGERÐ

um Verðjöfnunarsjóð fiskiðnaðarins.

1. gr.

Hlutverk Verðjöfnunarsjóðs fiskiðnaðarins er að draga úr áhrifum verðsveiflna, er verða kunna á útflutningsafurðum fiskiðnaðarins.

Lögheimili Verðjöfnunarsjóðs og varnarþing er í Reykjavík.

2. gr.

Verðjöfnunarsjóður skiptist eftir tegundum afurða í eftirgreindar deildir, er hafa aðskilinn fjárhag:

1. Deild fyrir frystar fiskafurðir, þar með taldar frystar sjávarafurðir skeldýra og krabbadýra.
2. Deild fyrir saltfiskafurðir.
3. Deild fyrir afurðir sildar- og fiskimjölsverksmiðja (mjöl og lýsi).

3. gr.

Ráðherra skipar stjórn Verðjöfnunarsjóðs til fjögurra ára í senn á þann hátt, sem hér segir:

Fimm stjórnarmenn sitja í stjórn allra deilda Verðjöfnunarsjóðs, þar af skulu þrír stjórnarmanna skipaðir án tilnefningar, einn maður samkvæmt sameiginlegri tilnefningu Farmanna- og fiskimannasambands Íslands og Sjómannasambands Íslands og einn maður eftir tilnefningu Landssambands íslenskra útvegsmanna.

Ráðherra skipar tvo menn í stjórn hvernar deildar eftir tilnefningu hagsmunasamtaka í þeirri grein fiskiðnaðarins, sem í hlut á. Taka þeir sæti í stjórninni, þegar fjallað er um málefni deildarinnar, svo sem við ákvörðun um verðgrundvöll. Þeir skulu tilnefndir þannig:

1. Í deild fyrir frystar fiskafurðir:

Einn maður eftir tilnefningu Sölumiðstöðvar hraðfrystihúsanna og einn maður eftir tilnefningu sjávarafurðadeildar Sambands íslenskra samvinnufélaga.

2. Í deild fyrir saltfiskafurðir:

Tveir menn eftir tilnefningu Sölusambands íslenskra fiskframleiðenda.

3. Í deild fyrir afurðir sildar- og fiskmjölsverksmiðja:

Tveir eftir tilnefningu Félags íslenskra fiskmjölsframleiðenda.

Ráðherra skipar formann sjóðsstjórnar.

Ráðherra ákveður þóknun sjóðsstjórnarinnar og skiptingu kostnaðar á deildir.

4. gr.

Seðlabanki Íslands hefur á hendi rekstur Verðjöfnunarsjóðs undir eftirliti sjóðsstjórnar, þ. á m. innheimtu, greiðslur, reikningsfærslu og ávöxtun inneigna. Endurskoðendur reikninga Seðlabankans hafa á hendi endurskoðun reikninga sjóðsins.

Hver deild Verðjöfnunarsjóðs skal hafa sjálfstæðan fjárhag.

Reikningsár sjóðsins er almanaksárið. Reikningar sjóðsins skulu birtir í B-deild Stjórnartíðinda.

5. gr.

Formaður boðar fundi með hæfilegum fyrirvara. Hann stýrir atkvæðagreiðslum, sér um færslu gjörðabókar og annast fundarstjórn að öðru leyti.

Í gjörðabók skal færa ákvarðanir stjórnar og skýrslu um annað það, sem gerist á fundi.

Fundur stjórnar er ályktunarfær, ef helmingur stjórnarmanna er á fundi, enda sé til hans boðað með lögmætum hætti og minnst öðrum fulltrúa hvors hagsmunaaðila (þ. e. veiða og vinnslu), sé fært að mæta.

6. gr.

Sjóðsstjórninni er heimilt að ráða sér ritara, sem skal annast ritun fundargerða og önnur verkefni, er stjórnin felur honum.

Heimilt er sjóðsstjórninni að kveðja aðra menn en stjórnarmenn á fund, stjórninni til ráðuneytis um einstök málefni, svo og að ráða sérfræðinga til starfa að tilteknum viðfangsefnum, eftir því, sem þurfa þykir.

7. gr.

Tekjur Verðjöfnunarsjóðs skulu vera allt að helmingur af verðhækkun, sbr. 9. og 10. gr., sem verður á þeim afurðum fiskiðnaðarins til útflutnings, sem reglugerð þessi nær til. Renna þessar tekjur til viðkomandi deilda sjóðsins.

Við upphaf framleiðslutímabils, sem sjóðsstjórnin ákveður, er henni heimilt að ákveða þann hluta áætlaðrar verðhækkunar, sem innheimta skal jafnóðum af útflutningsandvirðinu. Breyta má þessari ákvörðun á framleiðslutímabilinu. Skulu greiðslur þessar innheimtar við gjaldeyrisskil til banka eða hjá sölusamtökum fiskiðnaðarins á gjalddögum, sem sjóðsstjórnin ákveður.

Þegar sölu á afurðum framleiðslutímabilsins er lokið, skal endanlegt uppgjör fara fram á greiðslum til sjóðsins samkvæmt reglugerð þessari.

8. gr.

Til greiðslu verðbóta úr Verðjöfnunarsjóði kemur, þegar meðalverð framleiðslu til útflutnings af einhverri þeirra útflutningsafurða fiskiðnaðarins, sem reglugerð þessi nær til, hefur lækkað á grundvelli eins árs eða framleiðslutímabils, sbr. 9.—11. gr. Verðbætur skulu þó aldrei nema meiru en helmingi verðlækkunarinnar og ekki umfram það fé, sem viðkomandi deild ræður yfir, þegar til greiðslu verðbóta kemur.

Greiðsla úr Verðjöfnunarsjóði samkvæmt 1. mgr. er gjaldkræf, þegar endanlegt uppgjör á sölu afurða framleiðslutímabilsins liggur fyrir. Þó er sjóðsstjórninni að fengnu samþykki ráðherra heimilt að inna fyrr af hendi greiðslur upp í væntanlegar verðbætur samkvæmt 1. mgr.

9. gr.

Sjóðsstjórnin ákveður viðmiðunarverð og gerir tillögu til ráðherra um verðbil og hlutföll þau, er greiðslur í eða úr sjóðnum miðast við, sbr. 7. og 8. gr. reglugerðarinnar.

Að fenginni samþykkt sjóðsstjórnar, tekur ráðherra afstöðu til þeirra atriða, sem greinir í 1. mgr. þessarar greinar, sbr. 7. og 8. gr. laga nr. 72/1969.

10. gr.

Við ákvörðun viðmiðunarverðs skal sjóðsstjórnin einkum hafa hliðsjón af verðlagi þriggja undanfarinna ára, svo og af niðurstöðum Verðlagsráðs sjávarútvegsins um afkomu framleiðslunnar, þó þannig, að tekið sé tillit til sérstakra ástæðna, svo sem óvenjulegra breytinga á erlendum mörkuðum, gengisbreytinga og annarra hliðstæðra atvika. Sjóðsstjórnin ákveður myndun sérreikninga fyrir einstakar framleiðslutegundir innan deilda.

Ákveða má, að hlutföll greiðslna í eða úr sjóðnum sbr. 7. og 8. gr. séu föst eða stigbreytileg miðað við hlutfallslega breytingu verðs og heildaraflamagns. Enn fremur má ákveða, að verðbreytingar að vissu marki frá viðmiðunarverði, þ. e. verðbil, hafi ekki í för með sér skyldu til greiðslu í eða úr sjóðnum.

11. gr.

Hafi verðfall afurða, er falla undir ákvæði reglugerðar þessarar, orðið svo mikið, að hagkvæmara þyki að færa notkun veiðiskipa eða vinnslutækja yfir til annarra veiða eða vinnslu, getur ráðherra ákveðið, að fengnum tillögum sjóðsstjórnar, að bæta skuli upp verð viðkomandi afurða með hliðsjón af þeim bótum, er fallið hefðu á óbreyttar veiðar eða vinnslu með hlutaðeigandi tækjum.

12. gr.

Ákvarðanir samkvæmt 9.—11. gr. skulu birtar í B-deild Stjórnartíðinda og Lögbirtingablaði. Ákvarðanir samkvæmt 7. gr. skulu birtar í Lögbirtingablaði.

Reglugerð þessi er sett samkvæmt lögum nr. 72 28. maí 1969, um Verðjöfnunar-sjóð fiskiðnaðarins til þess að öðlast þegar gildi og birtist til eftirbreytni öllum þeim, er hlut eiga að máli

Sjávarútvegsráðuneytið, 8. júlí 1971.

Eggert G. Þorsteinsson.

Jón L. Arnalds.

Nr. 124.

9. júlí 1971.

REGLUGERÐ**um Fiskræktarsjóð.**

1. gr.

Fiskræktarsjóður er stofnaður samkvæmt XIV. kafla laga nr. 76/1970 um lax- og silungsveiði.

2. gr.

Hlutverk sjóðsins er að styðja fiskrækt og fiskeldi í landinu.

3. gr.

Með stjórn Fiskræktarsjóðs fara Veiðimálanefnd og veiðimálastjóri, en ákvarðanir um styrki og lán úr sjóðnum eru háð samþykki landbúnaðarráðherra.

4. gr.

Lán og styrki skal veita til framkvæmda, er lúta að fiskrækt eða fiskeldi, enda samþykki veiðimálastjóri tilhögun framkvæmda, þær séu gerðar undir eftirliti hans og hann mæli með styrkveitingu.

5. gr.

Styrk, er nemi allt að $\frac{1}{3}$ af áætluðum kostnaði, njóta:

- a. Fiskvegir og önnur meiri háttar mannvirki, er miða að því að auka fiskfór um vatn.
 - b. Klakhús og eldisstöðvar.
- Styrkveitingar skulu miðast við varanleg mannvirki.

6. gr.

Umsóknir um lán og styrki úr Fiskræktarsjóði skal senda stjórn sjóðsins fyrir lok febrúarmánaðar ár hvert. Greiðslur úr sjóðnum fara fram í maímánuði og desembermánuði eftir því, sem fé verður fyrir hendi.

7. gr.

Styrkir skulu greiddir út á mannvirki, þegar þau hafa verið tekin út. Þó skal heimilt að greiða allt að helming af áætluðum styrk út á mannvirki í byggingu, þegar sérstaklega stendur á, enda sé þá lokið minnst $\frac{2}{3}$ af verkinu, hvað kostnað snertir.